

**PRAVILNIK O ZAŠTITI OD POŽARA
U ORGANU UPRAVE GRADA SARAJEVA**

Na osnovu člana 24. Zakona o zaštiti od požara i vatrogastvu („Službene novine Federacije Bosne i Hercegovine“, broj 64/09) i člana 79. Statuta Grada Sarajeva („Službene novine Kantona Sarajevo“, broj 7/23), gradonačelnik Grada Sarajeva donosi:

PRAVILNIK o zaštiti od požara u organu uprave Grada Sarajeva

POGLAVLJE I – OPĆE ODREDBE

Član 1. (Predmet)

Ovim Pravilnikom se, u skladu sa Zakonom o zaštiti od požara i vatrogastvu („Službene novine Federacije Bosne i Hercegovine“, broj 64/09), u daljnjem tekstu (zakon), i tehničkim propisima, utvrđuju pitanja organizovanja, sprovođenja i unaprjeđivanja zaštite od požara u organu uprave Grada Sarajeva (u daljnjem tekstu: „Grad Sarajevo“).

Član 2. (Obuhvat)

Zaštita od požara obuhvata skup mjera i radnji upravne, organizacione, stručne, tehničke, obrazovne i propagandne prirode, koje se preduzimaju u cilju sprječavanja, nastanka i širenja požara, njegovog ranog otkrivanja i zaštite ljudi, biljnog i životinjskog svijeta, materijalnih, kulturnih, historijskih i drugih dobara i okoliša (u daljnjem tekstu: materijalna dobra).

Član 3. (Vrsta djelatnost)

Zaštita od požara je djelatnost od posebnog društvenog interesa za Federaciju BiH, kanton, grad i općinu, a ostvaruje se provođenjem zakona i podzakonskih propisa i međunarodnih tehničkih normativa i standarda koji važe u Bosni i Hercegovini.

Član 4. (Sadržaj Pravilnika)

Ovim Pravilnikom se naročito utvrđuju:

- a) način organizovanja i ostvarivanja zaštite od požara;
- b) mjere za provođenje i unaprjeđivanje zaštite od požara;
- c) način upoznavanja zaposlenih lica sa opasnostima od požara na radnom mjestu prilikom prijema i raspoređivanja tih lica na radno mjesto, kao i prilikom premještanja sa jednog na drugo radno mjesto;
- d) dužnost i odgovornost svih zaposlenih lica u provođenju propisanih mjera zaštite od požara;
- e) obaveza određivanja zaposlenog lica koje će biti zaduženo da se stara o provođenju mjera zaštite od požara utvrđenih ovim aktom;
- f) obaveza i način stručnog osposobljavanja zaposlenih lica za provođenje mjera zaštite od požara na radnim mjestima, kao i izrada posebnih radnih uputstava za zaposlena lica koja su raspoređena na radna mjesta za koja se zbog postojanja povećane opasnosti od požara, mogu predvidjeti posebne mjere zaštite od požara;
- g) sadržaj i način donošenja plana zaštite od požara i način provođenja tog plana;
- h) način vršenja unutrašnje kontrole provođenja predviđenih mjera zaštite od požara i način vođenja evidencija o provođenju propisanih mjera zaštite od požara;
- i) mjesto i prostori u kojima mora biti zabrana proizvodnje, korištenja i prenošenje otvorene vatre;

- j) dužnost i način ponašanja zaposlenih lica u slučaju pojave požara;
- k) disciplinska odgovornost za zaposlena lica zbog nepridržavanja propisanih mjera zaštite od požara;
- l) prelazne i završne odredbe.

Član 5.

(Zabranjeno postupanje)

Nitko nema pravo da svojim materijalnim dobrima i svojim postupcima, neprovođenjem mjera zaštite od požara, propisanih zakonom i drugim propisima, dovodi u opasnost od požara tuđi život i zdravlje i materijalna dobra.

Član 6.

(Obaveza provođenja mjera)

Mjere zaštite od požara propisane ovim Pravilnikom, zakonom, zakonskim i tehničkim propisima, mjerama koje su naložene od strane nadležnih organa, dužni su da sprovedu svi zaposlenici Grada Sarajeva, kao i druga lica koja se po bilo kom osnovu nalaze ili zadržavaju u prostorijama Grada Sarajeva.

Član 7.

(Obaveza urednog vođenja dokumentacije)

Grad Sarajevo je dužan organizovati stalno vođenje, sređivanje i čuvanje odgovarajuće dokumentacije iz oblasti zaštite od požara (pravilnici, elaborati, programi, uputstva, izvještaji, informacije, zapisnici, odluke i sl.)

POGLAVLJE II – NAČIN ORGANIZOVANJA I OSTVARIVANJA ZAŠTITE OD POŽARA

Član 8.

(Prostorije)

Zaštita od požara se organizuje i provodi u svim prostorijama koje koristi Grad Sarajevo, a koje prema procjeni ugroženosti od požara mogu biti izložene opasnosti od izbijanja i širenja požara.

Član 9.

(Primjena mjera zaštite)

U cilju otklanjanja uzroka, sprječavanja, izbijanja i širenja požara, spašavanja ljudi i imovine ugrožene požarom u prostorijama koje koristi Grad Sarajevo, opremi i instalacijama, kao i prostoru oko njih, primjenjuju se mjere zaštite od požara utvrđene ovim Pravilnikom.

POGLAVLJE III – MJERE ZA PROVOĐENJE I UNAPRJEĐIVANJE ZAŠTITE OD POŽARA

Član 10.

(Opće mjere)

U prostorijama koje koristi Grad Sarajevo provode se sljedeće mjere:

- a) Prilazi do izlaznih vrata, hidranata, vatrogasnih aparata i glavnih razvodnih baterija električne energije moraju uvijek biti slobodni;
- b) U prostorijama je dozvoljena upotreba samo onih električnih uređaja i instalacija koji po svojim tehničkim karakteristikama odgovaraju tehničkim propisima i prostornim zahtjevima;
- c) Električni uređaji i instalacije moraju biti tako izvedeni i zaštićeni da uslijed djelovanja prostornih uslova (vlaga, prašina, zapaljivi gasovi, mehanička oštećenja i sl.) ne bude ugrožena sigurnost ljudi i objekata;

- d) Obavezno je redovno, u propisanim rokovima i u skladu sa tehničkim propisima, vršenje kontrole ispravnosti električnih uređaja i instalacija, te otklanjanje uočenih nedostataka, o čemu mora postojati odgovarajuća evidencija. Popravke i druge radove na električnim instalacijama mogu vršiti samo stručna lica;
- e) Izvan radnog vremena svi uređaji moraju biti isključeni;
- f) Razvodne baterije i ormari moraju imati prekidač na glavnom dovodu električne energije. Sva oprema u razvodnim baterijama i ormarima mora biti označena prema jednopolnoj shemi koja se mora nalaziti u svim razvodnim ormarima. Topivi osigurači ne smiju se krpiti i premoštavati.

Član 11.

(Mjere pri projektovanju i izvođenju radova na adaptaciji i rekonstrukciji)

- (1) Pri projektovanju i izvođenju radova na adaptaciji i rekonstrukciji prostorija Grada Sarajeva primjenjuju se mjere normativne zaštite od požara propisane Zakonom, tehničkim propisima i standardima za zaštitu od požara;
- (2) Elektropostrojenja, instalacije i uređaji treba da budu izvedeni prema važećim tehničkim propisima i standardima za elektrouređaje;
- (3) Elektro-motori i drugi uređaji i instalacije moraju biti propisno izvedeni, ugrađeni i zaštićeni shodno odredbama postojećih propisa, a njima mogu rukovati i održavati ih samo obučena lica;
- (4) Pri izvođenju bilo kakvih radova na instalacijama i postrojenjima potrebno je osigurati propisane mjere zaštite od požara.

Član 12.

(Mjere u procesu rada)

- (1) U procesu preuzimanja od dobavljača, skladištenja i upotrebljavanja roba i drugog potrošnog zapaljivog eksplozivnog materijala, moraju se obezbijediti i provesti mjere i postupci zaštite od požara propisane Zakonom, tehnološkim postupkom i uputstvom proizvođača.
- (2) Neophodno je obezbijediti ispravnost tehničkih i sigurnosnih protupožarnih uređaja instaliranih u Gradu Sarajevu, čime se obezbjeđuje sprovođenje propisanih mjera zaštite od požara.
- (3) U Gradu Sarajevu se, kao posebna mjera zaštite od požara u procesu rada, obezbjeđuje izbor materijala i uređaja koji se koriste u procesu rada, a kojima se obezbjeđuje sigurnost od nastanka požara.
- (4) U prostorijama Grada Sarajeva neophodno je obezbijediti sljedeće mjere:
 - a) Zaključavanje svih elektrorazvodnih ormara i postrojenja odgovarajućim sigurnosnim bravama;
 - b) Redovno održavanje čistoće u prostorijama;
 - c) Postavljanje potrebnog broja tabli upozorenja i obavještenja;
 - d) Zabraniti upotrebu aparata i uređaja koji imaju otvorena grijna tijela (grijalice, električna kuhala i slično) čija bi upotreba mogla da izazove varničenje i pojavu požara i eksplozije;
 - e) Zabraniti upotreba produžnih kablova koji nisu u odgovarajućoj protiveksplozivnoj izvedbi;
 - f) Zabraniti ulaz neovlaštenim osobama.

Član 13.

(Mjere pri skladištenju i manipulaciji zapaljivih i opasnih materija)

U slučaju potrebe, skladištenje i pretakanje zapaljivih tečnosti, obavlja se na način propisan Zakonom o prometu eksplozivnih materija, zapaljivih tečnosti i gasova, Zakonom o zaštiti na radu i drugim relevantnim propisima kojima je regulisana ova materija.

Član 14.

(Mjere održavanja i kontrole ispravnosti instalacija i uređaja)

Neophodno je obezbijediti redovno održavanje i kontrolu ispravnosti instalacija i uređaja u Gradu Sarajevu, i to:

- a) Uređaje – opremu, električne instalacije i opremu treba periodično ispitivati shodno odredbama Zakona i tehničkim propisima, a o izvršenim ispitivanjima od strane ovlaštene osobe treba voditi evidenciju;
- b) Redovno obavljanje pregleda ispravnosti opreme, instalacija i uređaja za gašenje i dojavu požara;
- c) Redovna kontrola funkcionalnosti ventilacije prostorija;
- d) Redovna kontrola stanja galvanskih veza metalnih dijelova prostorija.

Član 15.

(Mjere pri izvođenju radova rezanja i zavarivanja)

- (1) Radovi zavarivanja, rezanja, lemljenja i drugi radovi sa otvorenim plamenom mogu se izvoditi samo ako su prethodno obezbijedene propisane mjere zaštite od požara.
- (2) Radovi zavarivanja na privremenim mjestima se mogu obavljati samo po prethodno pribavljenom odobrenju izdanom od zaposlenog lica za zaštitu od požara Kantonalne uprave civilne zaštite Kantona Sarajevo.
- (3) Prilikom obavljanja radova u prostorijama i na instalacijama ukoliko se vrše poslovi rezanja ili zavarivanja autogenim aparatom ili elektrolučnog zavarivanja potrebno je prilikom obavljanja ovih poslova poduzeti odgovarajuće mjere koje bi spriječile nastanak požara, čiji bi uzrok bio rezanje ili zavarivanje.
- (4) Neophodne mjere koje je izvršilac radova (eksterni izvođač) dužan izvršiti pri poslovima rezanja i zavarivanja su:
 - a) prije početka poslova rezanja i zavarivanja potrebno je izraditi elaborate zaštite na radu i zaštite od požara u kojem bi se propisale konkretne mjere, postupci i sredstva za gašenje požara, kao i zaduženja lica koja će u slučaju nastanka požara izvršiti gašenje istog. Izvođenje ovih radova preciznije je regulisano Pravilnikom o izgradnji postrojenja za zapaljive tečnosti i uskladištenje i pretakanje zapaljivih tečnosti,
 - b) kod rada u blizini zapaljivih materija mora se obezbijediti materijal od pada, pretakanja, pojavu varnica i drugo, a po završetku poslova zavarivanja i rezanja pregledati prostor da se u neposrednoj blizini zapaljivih materija ne nalazi skrivena usijana čestica koja bi naknadno mogla izazvati požar,
 - c) boce za plinsko zavarivanje i rezanje moraju se osigurati od pada i biti udaljene od grijnog tijela (radijator, grijalica, peć i sl.) minimalno 5m, odnosno 10m od mjesta rada sa otvorenim plamenom.

Član 16.

(Mjere kod izvođenja radova održavanje elektroinstalacija)

- (1) Radove na elektro instalacijama u cilju održavanja ili izmjene može se vršiti samo prema izrađenom projektu kojeg prethodno treba usaglasiti sa važećim tehničkim propisima, kao i na osnovu utvrđenih zona. Ugrađeni materijali mogu da budu samo određene kvalitete koja odgovara projektnoj dokumentaciji.
- (2) Radove mogu da vrše samo lica elektro struke koja su osposobljena za ovu vrstu poslova.

Član 17.

(Mjere zaštite postavljanjem uređaja za gašenje i dojavu požara)

- (1) Svi prostori Grada Sarajeva, a posebno prostorije u kojima se vrši skladištenje i manipulacija roba i drugog potrošnog materijala neophodnih za rad u Gradu Sarajevu i prostori arhive, obezbjeđuju se uređajima, instalacijama i opremom za sprječavanje, dojavu i gašenje požara.

- (2) Aparati za gašenje početnih požara postavljaju se u blizini mogućeg izbijanja požara, na uočljivom i vidnom mjestu.
- (3) Udaljenost između aparata ne smije biti veća od 20m.
- (4) Prijenosni aparati mogu biti smješteni na pod ili postavljeni na zid i to tako da ručka za nošenje aparata ne bude na visini većoj od 1,5 m od poda.
- (5) Grada Sarajeva kao vlasnik/korisnik ručnih aparata za početno gašenje požara, dužan je da obezbijedi njihovo održavanje i ispitivanje ispravnosti i funkcionalnosti u skladu sa zakonom.
- (6) Održavanje aparata obuhvata:
 - redovni pregled,
 - periodični pregled.
- (7) Redovan pregled vrši zaposleno lice za zaštitu od požara Grada Sarajeva i o tome mora voditi propisanu evidenciju.
- (8) Periodični pregled vrši se u skladu sa Pravilnikom o izboru i održavanje aparata za gašenje početnog požara koji se mogu stavljati u promet sa garantnim rokom i rokom servisiranja.
- (9) Sva oprema za gašenje požara mora se nalaziti u ispravnom i funkcionalnom stanju, smještena i raspoređena na pristupačna mjesta, propisno označena i obezbjeđena od oštećenja, nenamjenske upotrebe i vremenskih neprilika.
- (10) Zabranjeno je opremu i sredstva za gašenje požara koristiti u nenamjenske svrhe.

POGLAVLJE IV – NAČIN UPOZNAVANJA ZAPOSLENIH LICA SA OPASNOSTIMA OD POŽARA

Član 18.

(Obaveza Grada Sarajeva)

Grada Sarajevo je dužan upoznati svakog uposlenika sa opasnostima od požara vezano za poslove i radne zadatke na koje je raspoređen, kao i sa opremom, uređajima i sredstvima za gašenje požara, praktičnom upotrebom aparata za početno gašenje požara i drugih uređaja za gašenje požara, i sa materijalom i drugom odgovornošću uslijed nepridržavanja propisanih mjera zaštite od požara.

Član 19.

(Način vršenja upoznavanja)

Upoznavanje uposlenika se opasnostima od požara obavezno se vrši na način:

- a) da sva zaposlena lica bez obzira na vrstu rada (zaposleni na neodređeno i određeno vrijeme, pripravnici, volonteri i sl.) podliježu obavezi upoznavanja sa svim izvorima opasnosti koji mogu dovesti do nastanka požara;
- b) da se zaposlena lica upoznaju sa mjestima gdje se nalaze sredstva i oprema za zaštitu od požara;
- c) da se odrede pojedinac ili služba koja će organizovati upoznavanje zaposlenih lica o izvorima opasnosti i mjerama koje treba sprovoditi na sprječavanju nastanka požara.

POGLAVLJE V – DUŽNOST I ODGOVORNOST SVIH ZAPOSLENIH LICA U PROVOĐENJU PROPISANIH MJERA ZAŠTITE OD POŽARA

Član 20.

(Dužnost i odgovornost)

Sva zaposlena lica su dužna da provode sve mjere zaštite od požara propisane Zakonom i Pravilnikom o zaštiti od požara i mogu biti odgovorna disciplinski, materijalno i krivično ukoliko se ne pridržavaju propisanih mjera zaštite od požara.

Član 21.

(Obaveza gradonačelnika Grada Sarajeva)

Odgovorno lice za organizovanje zaštite od požara u Gradu Sarajevu je gradonačelnik Grada Sarajeva koji ima sljedeće dužnosti:

- a) donosi sve propisane akte Grada Sarajeva (pravilnik o zaštiti od požara, procjenu ugroženosti, plan zaštite od požara, plan obuke zaštite od požara i sl.);
- b) obezbjeđuje sredstva za realizaciju zaštite od požara;
- c) odobrava finansijska sredstva u vezi sa zaštitom od požara;
- d) određuje uposlenika koji će sprovoditi propisane mjere zaštite od požara;
- e) naređuje otklanjanje nedostataka utvrđenih od strane nadležnih organa;
- f) pokreće postupak za utvrđivanje odgovornosti za povredu radnih obaveza nastalih nepridržavanjem mjera zaštite od požara;
- g) brine se da se bezuslovno izvršavaju i sprovode sve odredbe ovog Pravilnika, odluke, zaključci i drugi akti koji se odnose na zaštitu od požara;
- h) aktivno učestvuje u organizaciji obuke i provjeri znanja zaposlenika iz oblasti zaštite od požara, nabavke aparata za gašenje početnog požara i druge opreme, izradi plana zaštite od požara i procjene ugroženosti, i
- i) vrši i druge poslove u skladu sa zakonom o zaštiti od požara i vatrogastvu.

Član 22.

(Mogućnost zaključenja ugovora)

Gradonačelnik Grada Sarajeva za određene poslove iz oblasti zaštite od požara može zaključiti ugovor sa ovlaštenim pravnim licem, odnosno društvom koje je registrovano za obavljanje poslova iz oblasti zaštite od požara i koje ima odgovarajuće stručne kadrove, opremu i sredstva za vršenje tih poslova.

Član 23.

(Dužnost radnika zaduženog za vođenje poslova zaštite od požara)

- (1) Gradonačelnik Grada Sarajeva određuje zaposleno lice koje će biti zaduženo da se stara o provođenju mjera zaštite od požara, ukoliko poslovi zaštite od požara ne budu sadržani u opisu radnog mjesta.
- (2) Zaposleno lice koje se stara o provođenju mjera zaštite od požara mora imati završenu najmanje srednju stručnu spremu odgovarajućeg smjera.
- (3) Dužnost radnika zaduženog za vođenje poslova zaštite od požara su sljedeće:
 - a) da se brine o ispravnosti električne, toplovodne, gromobranske, dimovne i druge instalacije;
 - b) vrši kontrolu opreme za gašenje požara u smislu da su u pripravnosti i u ispravnom stanju uređaji, alati i oprema za gašenje požara te da se nalaze na vidnim i lako dostupnim mjestima,
 - c) brine se o redovnoj kontroli aparata za početno gašenje požara;
 - d) brine se o obuci, kao i provjeri znanja uposlenika iz oblasti zaštite od požara;
 - e) brine se o obezbjeđenju prohodnosti svih požarnih prilaza i prolaza;
 - f) predlaže zabranu upotrebe otvorene vatre i drugih izvora paljenja u prostorijama u kojima bi zbog toga moglo doći do nastanka požara;
 - g) vodi svu potrebnu evidenciju iz oblasti zaštite od požara;
 - h) dostavlja izvještaje nadležnim organima o svim nedostacima i nepravilnostima u vezi sa zaštitom od požara;
 - i) predlaže zabranu rada na objektima, uređajima i instalacijama na kojima postoji neposredna opasnost od nastanka požara, ukoliko se takva opasnost na drugi način ne može otkloniti;
 - j) predlaže zabranu rada uposleniku koji grubo krši propise o zaštiti od požara ili na drugi način predstavlja opasnost da izazove požar;
 - k) sarađuje sa nadležnim inspekcijskim organima;
 - l) vrši i druge poslove u skladu sa zakonom.

Član 24.

(Dužnosti ostalih uposlenika)

- (1) Svaki uposlenik ima sljedeće dužnosti:
 - a) da se pridržava svih propisanih mjera zaštite od požara utvrđenih zakonom i drugim propisima, kao i uputstvima i upozorenjima odgovornog lica odnosno gradonačelnika Grada Sarajeva;
 - b) da se prilikom stupanja na rad upozna sa propisima i mjerama zaštite od požara vezano za poslove koje obavlja, praktičnom upotrebom prijenosnih aparata za početno gašenje požara i sa materijalnom i drugom odgovornošću uslijed nepridržavanja propisanih mjera zaštite od požara;
 - c) da u toku rada stalno upotpunjuju svoje znanje iz oblasti zaštite od požara i obavezno prisustvuje kursovima koji se organizuju radi obuke u vezi sa zaštitom od požara;
 - d) da u slučaju potrebe pristupi gašenju požara svim sredstvima i opremom za zaštitu od požara, da ova sredstva i opremu namjenski koristi da pažljivo rukuje opremom, istu održava u ispravnom stanju kao i da je ne udaljava od određenog mjesta;
 - e) da obavijesti odgovorno lice o svim kvarovima, nedostacima i drugim pojavama na instalacijama i uređajima koji bi mogli izazvati požar;
 - f) da poslije završenog rada pregleda okolinu i da isključi uređaje, električnu energiju i druge energetske medije kada za njihovom potrošnjom prestane potreba;
 - g) da se stara o prohodnosti svih prilaza, hodnika, stepeništa, a naročito požarnih puteva;
 - h) da učestvuje u spašavanju i pružanju prve pomoći u slučaju nesreće na radu, mjestu izazvane požarom, kao i drugim poslovima spašavanja materijalnih dobara bez obzira na propisano radno vrijeme i kvalifikaciju;
 - i) da obavlja i ostale poslove u vezi sa zaštitom od požara koje mu postavi odgovorno lice.
- (2) Svaki uposlenik koji primijeti da postoji neposredna opasnost od nastanka požara ili primijeti požar, obavezan je da opasnost otkloni, odnosno da požar ugasi, ukoliko to može da učini, bez opasnosti za ličnu bezbjednost ili bezbjednost drugog uposlenika.
- (3) Ukoliko uposlenik ne može da izvrši obavezu iz prethodnog člana, obavezan je da obavijesti vatrogasnu jedinicu, PU ili odgovarajući općinski organ.

POGLAVLJE VI – OBAVEZA I NAČIN STRUČNOG OSPOSABLJAVANJA ZAPOSLENIH LICA

Član 25.

(Obaveza stručnog osposobljavanja)

- (1) Svi zaposlenici će se kontinuirano stručno osposobljavati i usavršavati za zaštitu od požara u okviru svojih radnih mjesta.
- (2) Obrazovanje i osposobljavanje zaposlenika obuhvata njihovo upoznavanje sa svim izvorima opasnosti načinu provođenja mjera zaštite od požara, a nakon obuke izvršit će se i provjera znanja iz oblasti zaštite od požara.
- (3) Obrazovanje uposlenika obavlja se po programu zaštite od požara i to:
 - a) za novoprimljene radnike;
 - b) u slučaju izmjene tehnološkog postupka rada;
 - c) kod prijema na praksu ili stručno osposobljavanje.

Član 26.
(Program obuke)

- (1) Program obuke izrađuje ovlašteni uposlenik za vođenje poslova zaštite od požara ili stručno osposobljena organizacija za sprovođenje obuke uposlenika iz oblasti zaštite od požara i obavljanje poslova iz protupožarne zaštite.
- (2) Obuka uposlenika iz oblasti zaštite od požara sastoji se iz teorijskog i praktičnog dijela.
- (3) Obuka se vrši za sve radnike i na svim poslovima.
- (4) Obuka zaposlenika se vrši najmanje jednom u dvije godine.

Član 27.
(Ovlašteni organizatori obuke)

- (1) Obuku i provjeru znanja iz oblasti zaštite od požara mogu vršiti samo ovlaštena i stručno osposobljena društva i institucije koje za to imaju stručni kadar i posebna odobrenja od strane ovlaštenih institucija.
- (2) O završenoj obuci odnosno provjeri znanja izdaje se zapisnik, o čemu odgovorno lice vodi zapisanu evidenciju.

POGLAVLJE VII - PROCJENE UGROŽENOSTI OD POŽARA I PLANA ZAŠTITE OD POŽARA I NAČIN PROVOĐENJA TOG PLANA

Član 28.
(Vršenje procjene i donošenje plana zaštite od požara)

- (1) Gradonačelnik Grada Sarajeva je dužan obezbijediti vršenje procjene ugroženosti od požara temeljem kojeg će se izraditi plana zaštite od požara.
- (2) Procjenu ugroženosti od požara i izradu nacrtu plana zaštite od požara vrši pravno lice nadležno za obavljanje poslova zaštite na radu sa kojim se zaključuje ugovor nakon provođenja procedure javne nabavke.
- (3) Plan zaštite od požara je osnovni operativni akt za organizovanje i funkcionisanje zaštite od požara koji donosi gradonačelnik Grada Sarajeva koji ujedno i osigurava provođenje istog.

Član 29.
(Sadržaj plana zaštite od požara)

- (1) Plan zaštite od požara se sastoji od dva dijela i to:
 - a) preventivna zaštita (sprječavanje nastanka požara) i
 - b) operativna zaštita (gašenje požara).
- (2) Preventivna zaštita obuhvata: zaštitu građevina, prostora i imovine, određivanje tehničkih sredstava i opreme potrebne za sprovođenje preventivne zaštite, kao i druga važna pitanja.
- (3) Operativna zaštita obuhvata u prvom redu utvrđivanje načina gašenja požara pa sve do određivanja tehničkih sredstava i opreme potrebne za gašenje požara uz regulisanje sistem rukovođenja akcijom gašenja i određivanje mjera za saniranje posljedica nastalih od požara.

POGLAVLJE VIII – NAČIN VRŠENJA UNUTRAŠNJE KONTROLE PROVOĐENJA PREDVIĐENIH MJERA ZAŠTITE OD POŽARA I NAČIN VOĐENJA EVIDENCJA O PROVOĐENJU PROPISANIH MJERA ZAŠTITE OD POŽARA

Član 30.
(Ovlašteno lice)

Unutrašnju kontrolu provođenja zaštite od požara vrši zaduženo lice za provođenje mjera zaštite od požara.

Član 31.

(Sadržaj unutrašnje kontrole)

Unutrašnja kontrola provođenja mjera zaštite od požara vrši se redovnim pregledom i uvidom u:

- a) Normativne akte, planove, elaborate i druge akte kojim je regulisana zaštita od požara;
- b) Zapisnik inspekcijskih organa koji vrše nadzor nad provođenjem zaštite od požara;
- c) Provođenje mjere zaštite od požara predviđenih ovim Pravilnikom.

Član 32.

(Evidencije)

O provođenju propisanih mjera zaštite od požara moraju se od strane zaduženog lica voditi odgovarajuće evidencije:

- a) o obučenosti zaposlenika prilikom zasnivanja radnog odnosa;
- b) o obuci zaposlenika prema programu obuke zaposlenika u pravnim licima, državnim organima i drugim institucijama u oblasti zaštite od požara;
- c) o redovnom i periodičnom kontrolnom pregledu;
- d) o redovnoj kontroli i ispravnosti unutrašnje i vanjske hidrantske mreže;
- e) o redovnoj kontroli sistema aktivne zaštite.

POGLAVLJE IX – MJESTO I PROSTORI U KOJIMA MORA BITI ZABRANA PROIZVODNJE, KORIŠTENJA I PRENOŠENJA OTVORENE VATRE

Član 33.

(Zabrana)

- (1) U svim prostorijama koje koristi Grad Sarajevo korištenje otvorene vatre i plamena dozvoljeno je samo po odobrenju zaduženog lica za provođenje mjera zaštite od požara.
- (2) Svim uposlenicima su strogo zabranjene bilo kakve aktivnosti koje mogu izazvati nastanak požara (pušenje, bacanje čikova, upotreba rešoa, grijalica, alata koji varniče i svega onoga što izaziva plamen).

POGLAVLJE X – DUŽNOST I NAČIN PONAŠANJA ZAPOSLENIH LICA U SLUČAJU POJAVE POŽARA

Član 34.

(Način regulisanja)

Sva pitanja vezana za dužnosti i način ponašanja zaposlenih lica u slučaju pojave požara biće detaljno regulisana Planom zaštite od požara.

Član 35.

(Osnovne dužnosti zaposlenika u slučaju pojave požara)

- (1) Svaki uposlenik koji primijeti požar dužan je odmah pristupiti gašenju i lokalizovanju istog ako to može učiniti bez opasnosti za sebe i druge zaposlenike.
- (2) Ako zaposlenik nije u mogućnosti sam ugasiti požar dužan je obavijestiti ostale zaposlenike i izvršiti dojavu požara dispečerskom centru vatrogasne jedinice, te o nastalom požaru obavijestiti neposrednog rukovodioca i lice zaduženo za vođenje poslova zaštite.
- (3) Do dolaska vatrogasne jedinice na mjesto požara zaposlenici su dužni:
 - a) Organizovati spašavanje ugroženih lica;
 - b) Organizovati evakuaciju iz ugrožene zone sljedećih dokumenata: novca, tehničke i druge dokumentacije;
 - c) Zatvoriti prozore, vrata, ventilacione i druge otvore u cilju sprečavanja širenja požara;

- d) Preduzeti i druge radnje u zavisnosti od nastale situacije.

POGLAVLJE XI – DISCIPLINSKA ODGOVORNOST ZA ZAPOSLENA LICA ZBOG NEPRIDRŽAVANJA PROPISANIH MJERA ZAŠTITE OD POŽARA

Član 36.

(Povreda službene dužnosti)

Svaki uposlenik Grada Sarajeva koji ne poštuje odredbe ovog Pravilnika, zakonskih i tehničkih propisa iz oblasti zaštite od požara i koji ne provodi propisane mjere zaštite od požara čini težu povredu službene dužnosti.

Član 37.

(Disciplinska odgovornost)

Povrede službene dužnosti iz oblasti zaštite od požara koje podliježu disciplinskoj odgovornosti su:

- a) izazivanje požar namjerno ili iz nehata;
- b) nepristupanje gašenju požara ili ne obavijeste vatrogasci;
- c) neprovođenje općih i posebnih mjere zaštite od požara;
- d) upotrebljavanje otvorene vatre i plamena bez odobrenja lica zaduženog za zaštitu od požara;
- e) ometanje gašenja požara;
- f) ostavljanje neočišćenog radnom mjesta po isteku radnog vremena a što za posljedicu može imati izazivanje požara;
- g) nenamjensku upotreba aparata za gašenje početnog požara i opremu za aktivno gašenje požara ili izvrši njihovo oštećenje;
- h) nepristupanje obuci i provjeri znanja zaposlenika iz oblasti zaštite od požara;
- i) zakrčenje vanjskih i unutrašnjih požarnih puteva te prilaza do uređaja i opreme za gašenje početnih požara;
- j) kao i kršenje svih drugih zakonom propisanih mjera zaštite od požara usklađene zakonom.

Član 38.

(Pokretanje disciplinskog postupka)

Disciplinski postupak se pokreće na osnovu prijave, a postupak vodi i izriče disciplinske mjere disciplinska komisija koju imenuje gradonačelnik.

Član 39.

(Obaveza prijavljivanja nepoštivanja propisanih mjera)

Svaki uposlenik koji primijeti da je učinjena povreda službene dužnosti zbog nepridržavanja propisanih mjera zaštite od požara dužan je da podnese prijavu nadležnom organu za pokretanje disciplinskog postupka.

POGLAVLJE XII – PRELAZNE I ZAVRŠNE ODREDBE

Član 40.

(Primjena akata)

- (1) Ukoliko ovim Pravilnikom nisu regulisana neka pitanja iz oblasti zaštite od požara, primjenjivat će se neposredno odredbe Zakona o zaštiti od požara i vatrogastvu te drugi zakonski propisi iz oblasti zaštite od požara.
- (2) Detaljnije provođenje pojedinih mjera zaštite od požara, mogu se regulisati posebnim uputstvima, naredbama, procedurama, odlukama i aktima nadležnih službi i organa.

Član 41.
(Izmjene i dopune)


Izmjene i dopune ovog pravilnika se vrši na način i po postupku predviđenom za njegovo donošenje.

Član 42.
(Prestanak primjene)

Stupanjem na snagu ovog Pravilnika prestaje da važi Pravilnik o zaštiti od požara broj: 04-04-5290/20 od 01.10.2020. godine.

Član 43.
(Stupanje na snagu)

Ovaj Pravilnik stupa na snagu danom donošenja, a isti će se objaviti u „Službenim novinama Federacije Bosne i Hercegovine“.



GRADONAČELNIK

Predrag Puharić

Broj: 01/04-04-2873/25
Sarajevo, 24.04.2025. godine